

Exposicion “Aruba Dushi Tera”

Un exposicion den cuadro di 25 aña Status Aparte y 35 aña di celebracion di Himno y Bandera.

Exposicion “Aruba Dushi Tera” ta consisti di 8 exposicion cual hunto ta forma e letra di Himno di Aruba. Tur luna dia 18, for di maart 2011 te cu october 2011, un exposicion ta habri na un di e seis institucionnan cu ta den e proyecto. E institucionnan ta Archivo Nacional Aruba, Unoca/Scol di Arte, Museo Arkeologico, Parke Nacional Arikok, Museo Historico Arubano y Biblioteca Nacional Aruba, sucursal San Nicolas y departamento Arubiana/Caribiana.

E exposicionnan ta keda habri te cu februari 2012.




GRANDEZA DI BO PUEBLO TA SU GRAN CORDIALIDAD

Palabra ta forma e base di e exposicion *Grandeza di bo pueblo ta su gran cordialidad*. Nos deseo ta cu e palabranan cu a scoge ta inspira nos hendenan pa para un rato keto y reflexiona riba e nificacion di e frase aki den nos himno. Aruba poni riba un troncon di kwihi ta pa rindi homenahe na nos naturalesa. E Dande ta representa e bon deseo y pidimento di bendicion pa tur hende na Aruba y pa mundo henter. Dande ta parti di nos grandeza y nos cordialidad.

Exposicion “Aruba Dushi Tera”

Grandeza di bo pueblo ta su gran cordialidad



Metamorfosis

Un poema di Hubert “Lio” Booi

Biblioteca Nacional Aruba, 18 di september 2011



Biblioteca Nacional Aruba

Departamento Arubiana/Caribiana

Bachstraat 5, Oranjestad
T: 582 6924 F: 582 5493
www.bibliotecanacional.aw

Metamorfosis

“Aruba ta un isla

Chikito, contento

Cayente su solo

Constante su biento

Felis y contento

Nos ta biba aki

Ki dushi ta Aruba

Nos isla kerí”.

Asina temponan pasa

Cu alma y curason

Nos hendenan a expresa

Amor pa nan nacion.

Ma añanan a pasa bay

Cu cambionan real

E mundo mes ta sigui draai

Pa un rumbo material.

Custumbernan di nos pais

Ta parce descuida

Folclor ta perde su rais

Den ambiente mutila!

Ta bon pa purba acepta

Cu ‘n pueblo multicultural

Ta crea cierto situacion

Pero cu nos por probecha.

Ta bon tambe pa realisa

Cu tur bondad

N’ ta bin tur ora di afo!

Tampoco nos por lubida

Cu e sabor local

Tin un caudal di calidad

Cu n’ por ta descarta

Nos gran cordialidad!

Ban pone man na curason

Ban coregi e fayonan

Ban cuida e tesoronan

Rikesa grandi cultural

Di un pueblo den accion.

Paisanonan, di tur nacion

Nos n’ tin talbes pa comparti

Custumbernan acumula,

cu a haci e isla aki di nos

Un skina, si, privilegia

Den un mundo afligi?

Un sitio cu pa un y tur ta keda preferi!

Caminda hende ta central

Caminda amor, cordialidad

Por sigui existi.

Pa nos por tin un garantia

Cu mira pa prosperidad

Nos tin cu percursa tur dia

Pa mehora nos calidad.

Si nos kier cosecha progreso

Y biba cu tranquilidad

Ban pone pues awor mas peso

Ban practica urbanidad...!

Ta bon pa trata tur manera

Pa redobla nos cualidad

Ban pone “Aruba Dushi Tera”

Den fila “Un” di Calidad!

1997-Presentation pa “Aruba Quality Foundation”

Saca for di *E flamingo di Aruba*
Editorial Charuba, 2006

